

Zakarias

Speransa ta algu esensial pa bida. Un hende ku no tin speransa lo tin un bida hopi duru.

E hudiunan a regresá na e tera ku Dios a primintí Abraham i su desendientenan. Ma maske nan tabata bèk den nan mes tera, ketu bai nan tabata bou yugo di un nashon pagano. Nan tabata desanimá, deskurashá, oprimí...sin speransa. Dios a manda dos profeta (Hageo i Zakarias) ku un mensahe di speransa aplikabel tantu pa hudiunan di e era ei komo pa hende den futuro.

Debí ku Hageo i Zakarias a profetisá na e mèsun tempu, e trasfondo histórikiko ta identiko pa tantu e buki di Hageo komo esun di Zakarias. Pesei nos lo lista en korto e eventonan prinsipal (ku nos ya kaba a nota den ku nos estudio di buki di Hageo):

- 586 B.C. - Jerusalèm i tèmpe destruí dor ehersito di Babilonia; habitantenan di Juda a wòrdu hiba den eksilio na Babilonia
- 539 - konkísta di Babilonia
- 538 - dekreto di Siro ku eksiliadonan por regresá na nan tera natal
- 536 - 42.360 hudiu huntu ku 7.337 sirbidó a regresá na Jerusalèm bou gia di Zorobabel (Sesbasar ta un otro nòmber pa Zorobabel). Nan a kuminsá rekonstrui e tèmpe.
- 534 - konstrukshon di tèmpe a para
- 522 - Dario I a bira rei di Impero Media-Persia
- 520 - Hageo i Zakarias a enkurashá e hudiunan pa sigui ku konstrukshon di tèmpe
- 516 - tèmpe a keda kompletá

I. OUTOR DI E BUKI

A. SU NÒMBER

Zakarias ta un nòmber bastante komún den Beibel. Mas ku binti diferente persona den Tèstament Bieu tin e nòmber ei. E Zakarias ku nos ta studia ta mensioná solamente den tres otro teksto fuera di su mes buki (Esdras 5:1; 6:14; Nehemias 12:16).

ZEKAR-YAH (Zakarias na idioma hebreo) ta nifiká Jehová a kòrda òf esun ku Jehová a kòrda. Talbes su mayornan a dun'é un nòmber asina pasobra Dios a kontesta nan petishon deseando un yu (òf kisas orashon pa un yu hòmber). Di bèrdat por bisa ku “Jehová a kòrda” ta e esensia di e mensahe di e buki di Zakarias.

B. SU FAMIA

Zakarias a duna mas informashon di su famia ku algun profeta. Nòmber di Zakarias su tata tabata Berekias i su welo tabata yamá Ido (Zakarias 1:1). Un tal “Ido” ta listá huntu ku e saserdotenan i levitanan ku a regresá for di eksilio huntu ku Zorobabel (Neh 12:4,16). Pues ta parse ku Zakarias tabata un saserdote.

Esdras 5:1 ta yama Zakarias “yu hòmber di Ido”. Pakiko Zakarias ta yamá yu di Ido mientras e mes a bisa ku su tata ta yama Berekias? Kisas Esdras a bisa esaki pasobra Zakarias su tata ,Berekias, a muri promé ku su welo, Ido, i komo resultado Zakarias tabata identifiká mas

tantu ku su welo, Ido. Of ta pusíbel ku “yu” den e kaso aki ta referí na kualke desendiente i Ido ta mensioná pasobra e tabata prominente den e famia.

C. SU MINISTERIO

Dios tabata ke pa e tèmpelel wòrdu rekonstruí. Pa motivá e hudiunan pa hasi esaki, el a selektá dos profeta, Hageo i Zakarias. E koleganan aki a enkurashá e hudiunan pa kontinuá ku konstrukshon di e tèmpelel (Esdras 5:1; 6:14). Aparentemente nan a sigui ku e ministerio aki te tempu ku konstrukshon di tèmpelel a keda kompletá. Ta visto ku Hageo i Zakarias tabatin hopi influensia serka e hudiunan ku a regresá na Juda.

Komparando Zakarias 1:1 ku Hageo 1:1, Zakarias a inisiá su ministerio dos luna despues di Hageo. Zakarias lo tabata sirbi komo saserdote na momentu di su yamada. Pues, e por tabata un profeta-saserdote, manera Jeremias i Ezekiel. Targum hudiu tambe ta afirmá ku Zakarias tabata un profeta i saserdote.

Ta parse ku Hageo tabata di edat atvansá ora el a enkurashá e hudiunan pa sigui ku konstrukshon di tèmpelel. En kontraste, Zakarias lo tabata hóben. Ta parse ku Zakarias 2:4 ta referí na Zakarias komo un “*hoben*.” Si 2:4 ta referí na Zakarias mes, ento nos por dedusí ku Zakarias lo a nase na Babilonia i lo a regresá na Juda komo un mucha (536 B.C.). E lo tabata hóben kompará ku Hageo den nan ministerio enkurashando e hudiunan pa kaba konstruí e tèmpelel. Talbes e hendenan di edat mas atvansá tabata atraí na Hageo su mensahe pa pone man na obra mientras Zakarias a enkurashá esnan mas hóben pa partisipá den konstrukshon di e tèmpelel. Ma sin duda tur dos lo tabata oradónan dinámiko ku a motivá hende na akshon.

Hageo a enfatisá akshon, pa e hudiunan drecha nan relashon pa ku Dios i demonstrá esei dor di sigui traha e tèmpelel. Despues ku nan a kuminsá traha, Zakarias a aparesé riba pantaya. Su sermonnan tabata mas dirigí den direkshon di e kondishon spiritual di e pueblo mientras nan a traha. El a deseá pa nan repentí i tin un relashon korekto pa ku Dios pa nan por gosa Su bendishon. E tabata interesá pa nan eksperensia revivamentu (Zakarias 1:3-6; 7:8-14). Esaki lo prepará pueblo di Dios pa adorashon apropiá den e tèmpelel ora e keda kompletá. Esei tabata meta di su ocho vishonnan den kapitulonnan 1-6.

Un otro distinkshon ku nos por hasi entre e profetanen tabata ku Hageo su sermonnan a trata ku e situashon aktual di e hudiunan ku a regresá for di eksilio. En kontraste, Zakarias su profesianan tabata mas universal i a kontené mas pronostikashon. Kisas Zakarias tabata un hònber ku a pensa mas tanto tokante e añanan binidero. Dios a dun’é algun di e informashon profétiko mas detayá den Tèstament Bieu.

Di tur manera, e dos buki di Hageo i Zakarias ta bai bon huntu ku otro. Algun asta ta ekspresá ku kasi por tuma e buki di Hageo komo introdukshon pa e buki mas largu di Zakarias. Of por bisa ku Zakarias ta amplia i desaroyá e mensahe di Hageo.

E tèmpelel a keda kompletá na luna di mart di aña 515 B.C. (di seis aña di Dario su reinado segun Esdras 6:15). Dario I a sigui reina riba impero di Persia te aña 486 B.C. Ora Dario a muri, Xerxes I a bira rei i a reina te aña 465 B.C. (Tabata durante reinado di Xerxes I ku e storia di Ester a tuma lugá. Asuero tabata un otro nòmber pa Xerxes I.) Si Zakarias tabata na bida e tempu ei, pusíbelmente e tabata na haltura di e storia di Ester.

Zakarias su ministerio lo a kontinuá te su fayesementu. Hopi studiante di Beibel ta kere ku el a muri despues di aña 480 B.C. Si Zakarias su ministerio a kontinuá pa tantu aña despues di konstrukshon di tèmpelel, kiko su ministerio lo tabata? Sin duda Zakarias lo a enkurashá e hudiunan pa bishitá nan tèmpelel pa kumpli ku Dios Su rekisitonan. Ta parse ku e pueblo di Dios tabatin siertu inkietut pa ku nan futuro awor ku e tèmpelel a keda konstruí. Ma Dios a usa Zakarias pa duna nan informashon profétiko tokante un futuro glorioso pa Israel.

Si Zakarias su ministerio a kontinuá pa tantu aña, ki kondishon sosial lo el a enfrentá e tempu ei? Esdras a laga sa ku e hudiunan tabata kasa ku paganonan, loke Dios a prohibí (Esdras 9:1-15). Esdras a bin na tera di Israel i a trata severamente ku e problema na aña 458 B.C. Talbes añanan promé, Zakarias tambe a ripará e tendensia ei i prediká kontra esei. Pusíbelmente

su predikashinan a prevení e problema aki di sali fo'i man mas promé.

Tambe buki di Nehemias ta laga sa ku e hudiunan ni a konstruí e murayanan di Jerusalèm ainda. Nehemias mester a bin hasi esei na aña 445 B.C. Ta parse ku e habitantenan di e tera hudiu a konstruí nan mes kasnan (Hageo 1:3-11 - algun tabata basta luhoso) ma a ignorá rekonstrukshon di nan kapital. Talbes Zakarias a hala nan atenshon riba e problema aki tambe.

D. SU MORTO

Mateo 23:35 ta referí na “Zakarias, yu hòmber di Barakias.” Ta parse ku esaki por ta e mesun Zakarias ku a skirbi buki di Zakarias. Si esei ta e kaso, un multitud hudiu a mat'é na e tèmpel “entre e altá i e kas di Dios” (Mateo 23:35; Lukas 11:51). Pues, Zakarias a muri komo un martir pa un motibu deskonosí. Targum hudiu i e historiadó Josephus tambe ta konfirmá esaki.

II. LEKTORNAN DI E BUKI

Pa ken Zakarias a skirbi e buki mas largu di e profetanan menor? No tin duda ku Zakarias—meskos ku Hageo—a skirbi pa e 42.360 hudiu huntu ku e 7.337 sirbidó ku a regresá for di eksilio (1:2; 7:5) bou liderato di Zorobabel i nan desendientenan. Nan a biba den suidat di Jerusalèm i e area rònt di e stat unda Zorobabel (4:6-10) tabata gobernadó di Juda i e sumosaserdote tabata Josué (3:1-9; 6:11). Durante e era aki, pueblo di Dios tabata desanimá, sin speransa i spiritualmente indiferente. Tèmpel di Dios no tabata konstruí, murayanan di Jerusalèm tabata kibrá, tabatin sekura i e hudiunan tabata menasá pa paganonan.

III. FECHA DI E BUKI

Méskos ku su kolega Hageo, Zakarias a duna algun fecha eksakto den su buki. Den kaso di Zakarias, el a duna tres fecha ku eksaktitut. E promé fecha ta hañá den Zakarias 1:1 (“den e di ocho luna di e di dos aña” di Dario I). Pues, esaki ta na luna di òktober òf novèmber di aña 520 B.C. Hageo, kolega di Zakarias, a profetisá e mésun aña, na lunanan seis te nuebe. Pues, Hageo a kuminsá profetisá promé ku Zakarias.

E di dos fecha ku Zakarias a duna ta hañá den kapítulo 1, vèrsíkulo 7. Aki aña dos, luna 11 i dia 24 ta mensioná, tres luna despues di e promé fecha. Esaki lo ta dia 15 febrüari di aña 520 B.C. I e di tres fecha ku Zakarias a duna ta un fecha di dos aña despues. Esaki ta hañá den 7:1. E fecha aki ta aña kuater, luna nuebe i dia kuater, pues dia 7 desèmber di 518 B.C.

Notabel ta ku Zakarias 9-14 no tin fecha. Ta parse ku Zakarias a skirbi kapitulonan 9-14 basta tempu despues ku el a skirbi kapitulonan 1-8. Por bisa en general ku Zakarias 1-8 a wòrdu skirbí *mientras* e hudiunan tabata konstruí e tèmpel (520-516 B.C.). En kontraste, Zakarias 9-14 tabata skirbí *despues* di kompletashon di konstrukshon di e tèmpel, despues di 516 B.C. Asta ta parse ku Zakarias lo a skirbié na aña 480 B.C. òf asta despues (no mas tardá ku 470 B.C.). Un motibu ku studiantenan di Beibel ta yega na e fecha ei ta pasobra 9:13 ta referí na Gresia. E nahson di Gresia tabata bira un potensia mudial e tempu ei. Ta parse ku ya kaba e griegunan a derotá e persikonan i nan rei Xerxes den batayanan na Salamis, Plataea, i Mycale na añanan 480-479 B.C. Pues tabata mas òf ménos na e fecha ei ku Gresia a bira mas prominente.

Zakarias no a skirbi e buki durante síglo dos B.C. manera algun ta pretendé. E idioma hebreo ku Zakarias a usa ta puru hebreo. E no tabata e hebreo ku tabata usá den p.e. síglo dos B.C. ora hebreo tabata mas bruhá ku idioma arameo. E echu aki tambe ta duna indikashon ku e buki lo a wòrdu skirbi den un era mas promé.

IV. PROPOSITO I LEMA DI E BUKI

Por bisa ku lema di e buki ta ku Dios ta yalurs pa ku Jerusalèm i lo restorá e siudat. E lo preservá Su puebel chikitu for di e podernan mundial ku ta oprimí i menasá di destruí nan. Dios lo destruí e imperonan pagano, ma Jerusalèm lo sobreviví. Mesias lo bin pa establese Su reino i goberná riba henter mundu despues di derotá tur oposishon pagano.

Pakiko Zakarias a skirbi e buki? Nos por nota diferente motibu:

A. PA ENKURASHÁ E HUDIUNAN PA KABA KONSTRUÍ E TÈMPEL

Esaki tabata e prioridat di tantu Hageo komo Zakarias (Zakarias 1:16; 4:9; Esdras 5:1; 6:14). Kòrda ku tèmpelel tabata esensial pa adorá Dios i su sakrifisionan, ritonan, selebrashonnan, èts. E hudiunan a regresá for di eksilio animá. Nan a lamta altar promé, pone fundeshi pa tèmpelel, anto konstrukshon di tèmpelel a para (534 B.C.). Pa 14 aña ningun hende a traha. Anto na aña 520 B.C. Hageo i Zakarias a presentá i a enkurashá nan pa sigui traha. E hudiunan a skucha i a pone man na obra, kompletando e tèmpelel pa aña 516 B.C.

B. PA ENKURASHÁ REVIVAMENTU SPIRITUAL

Esaki tabata un di Zakarias su propositonan prinsipal (1:2-3). Maske e por tabatin otro proposito, nan bida spiritual lo tabata haltu riba su lista di prioridat. Pueblo di Dios a fria spiritualmente dor di nan apatia, desanimo i negativismo. Nan tabatin mester di revivamentu. I ta klaro ku revivamentu spiritual di mes lo tin e resultado ku nan lo pone man na obra pa konstruí tèmpelel.

Zakarias a mostra e habitantenan di Juda ku nan ta kulpabel di e mésun desobediencia ku nan antepasadonan a kometé, loke a resultá den nan deportashon (7:8-14). Den 7:8-14 tambe por nota Zakarias su énfasis riba hustisia sosial. E solushon ta pa nan repenti (1:3-5). Solamente obediencia lo habri porta pa Dios Su bendishon.

I ken por lubidá Zakarias 4:6? “No pa medio di forsa, ni pa medio di poder, ma pa medio di Mi Spiritu,’ e SEÑOR di ehèrsitonan ta bisa”. Méskos ku nan, nos tambe tin mester di poder di Spiritu Santu pa biba p’E. Forsa humano no por! E bida kristian no ta difisil...e ta un bida impusibel sin Spiritu Santu!

C. PA DUNA KONSUELO I SPERANSA

Zakarias ta un buki di speransa, konsuelo i enkurashamentu (1:13; 8:9). E hudiunan tabata pasa den un tempu di prueba difisil. Nan tabata desanimá i deskurashá. Zakarias su mensahe ta un mensahe di speransa: “Si boso bira na Dios, E ta kla pa bendishona boso awor i den futuro!” (2:13). El a laga sa ku Dios tin kontrol riba e situashon aktual i den futuro. Finalmente E lo sali viktوريوس!

Zakarias su vishonnan i profesianan tabata prinsipalmente mensahenan di konsuelo i enkurashamentu. El a mostra ku Dios ta sumamente interesá pa ku Su puebel: “esun ku mishi ku boso, ta mishi ku Su pret’i wowo” (2:8). Komo resultado, pueblo di Dios por tira nan “preokupashon riba djE, pasobra E ta pèrkurá pa boso” (1 Pedro 5:7).

D. PA DUNA UN REKÒRT PÈRMANENTE DI E PROFESIANAN DI E MESIAS BINIDERO

E hudiunan ku a tende Zakarias su profesianan, no a mira kumplimentu di su profesianan. Zakarias a profetisá di e promé binida di Mesias. Ma no tabata te 500 aña despues ku Kristo a bin. I su profesianan tambe a regardá e Mesias Su di dos binida, loke tabata miles di aña den futuro. Dor di skirbi e informashon, por tin un rekòrt duradero pa futuro.

Sin duda su profesianan tambe a enkurashá e hudiunan, demonstrando kla ku Israel lo sobreviví i ku nan Mesias ta bin.

V. STRUKTURA I KONTENIDO DI E BUKI

Por dividí e buki den dos parti. Nos por ripará algun diferencia general entre e dos sekshon.

KAPÍTULONAN 1-8	KAPÍTULONAN 9-14
Mas tantu vishonnan	Mas tantu profesianan verbal
Ta kontené fechanan - 1:1,7; 7:1	No ta kontené fechanan

Skirbí durante konstrukstrukshon di tèmpel (520 – 516 B.C.)	Skirbí despues di konstrukshon di tèmpel (despues di 516 B.C.)
Tin un mensahe pa e hudiunan ku a biba e tempu ei mes	Tin un mensahe pa tur Israel (presente i futuro) i paganonan

Nota e dos sekshon na plaka mas chikitu:

I. PROFESIANAN DURANTE KONSTRUKSHON DI TÈMPEL - 1-8

A. Introdukshon - 1:1-6

Un yamada general pa pueblo di Dios repintí. Zakarias a rekordá e hudiunan ku nan tatanan a bira katibu pasobra nan no a repintí.

B. Vishonnan - 1:7-6:15

Ta parse ku Zakarias a haña tur ocho vishon den ún solo anochi. Kada vishon a enfatisá Dios Su bendishon pa ku Su puebel i/òf Su reprendementu i huisio di e enemigunan di Su puebel. E instrukshon sentral di di e sekshon aki ta ligá ku konstrukshon di e tèmpel, maske tin implikashonnan eskatológiko.

1. Vishon di e kuater kabai - 1:7-17
2. Vishon di e kuater kachu - 1:18-21
3. Vishon di e liña di midi - 2
4. Vishon di e purifikashon di e sumosaserdote Josue - 3
5. Vishon di e kandelá di oro - 4
6. Vishon di e ròl ku ta bula - 5:1-4
7. Vishon di e muhe den makutu - 5:5-11
8. Vishon di e kuater garoshinan - 6

Por bisa ku e vishonnan aki ta sigui ku e pensamentu ku Hageo a inisiá (2:20-23). Dos luna anterior Hageo a pronostiká e derota di reinonan di mundu i eksaltashon di e Mesias, simbolisá pa Zorobabel.

C. Mensahenan - 7-8

E kapitulonon aki ta un pousa históriko i ta kontené kuater mensahe:

1. Pregunta tokante yunamentu - 7:1-7
Durante eksilio di e hudiunan, nan a inisia sierto dia di ayuno pa kòrda destrukshon di stat di Jerusalèm (2 Reinan 25:8; Jeremias 52:12). Awor un grupo di Bèt-èl a bin hasi pregunta si nan mester sigui ku e rito ei debí ku tèmpel ta rekonstruí. Zakarias a reprendé nan pasobra nan kondishon spiritual a hasi nan yunamentu sin balor. El a mostra ku yunamentu mester bin di kurason, no di kalènder.
2. Motibu pa eksilio - 7:8-14
Zakarias ta splika dikun e hudiunan a wòrdu plamá (pasobra nan no a repintí) pa spierta nan pa nan ta spiritualmente sensibel.
3. Dios lo bendishoná - 8:1-17
Pa Jerusalèm eksperensia Dios Su bendishon, e hudiunan mester biba manera Dios ke (8:16-17).
4. Israel su futuro glorioso - 8:18-23
Israel lo ta un sentro spiritual pa tur nashon. Yunamentu lo bira fiestamentu!

II. PROFESIANAN DESPUES DI KONSTRUKSHON DI TÈMPEL - 9-14

E sekshon aki ku ta kontené dos “karga” (profesia) ku ta pone énfasis riba Dios Su derota di potensianan mundial i Israel su liberashon. E promé “karga” ta mas general i ta enfatisá Dios Su derota di potensianan pagano den nan konflikto ku Israel. E di dos sekshon ta duna mas detaye di e eventonan anunsiá pa e promé sekshon. E kapitulonon aki (12-14) ta enfatisá e huisio ku ta purifiká Israel den su konflikto ku potensianan pagano mundial.

A. E Karga di Hadrak - 9-11

No ta konosí sigur unda Hadrak ta lokalísá. Ma ta parse ku Hadrak ta un stat òf pais stret nort di Israel (promé ku ta yega Turkia di awendia).

E sekshon aki ta kontené profesianan tantu di korto plaso komo di largu plaso.

1. Anunsiando e Rei - 9:1-10

* 9:1-8 – e konkísta di Alexander e Grandi

* 9:9 - ta enfatisá binida di e Mesias

2. Programa di e Rei - 9:11-10:12

* 9:11-17 - e viktorianan di e Makabeonan

* Kapítulo 10 – e binida di e Mesias.

3. Rechaso di e Rei - 11:1-17

* 11:1-9 - e konkísta di Roma

* 11:10-14 – binida di e Mesias

* 11:15-17 – binida di e anti-Kristo

B. E Karga di Israel - 12-14

E profesianan aki ta pa largu plaso so.

1. Viktoria final pa Israel - 12:1-13:6

* 12:1-9 – Israel den e tribulashon

* 12:10 – 13:6 – regreso di Kristo

2. Viktoria final pa e Rei - 13:7-14:21

* 14:1-3 – Bataya di Armagedon

* 14:4-7 – regreso di Kristo

* 14:8-21 - stablesimentu di e Reino

VI. OPSERVASHONAN DI E BUKI

A. PROFESIANAN DI E BUKI

Zakarias ta un buki profétiko. Maske e no a usa frasenan manera “dia di SEÑOR” òf “reino di Dios”, Zakarias a kontribuí hopi na nos komprendementu di eventonan eskatológiko.

E proposito sentral di Zakarias su profesianan ta pa mostra e glorifikashon di Sion i e derota di Israel su enemigunan, i e reino universal di Mesias. Israel ta esun prinsipal riba pantaya for di komienso te fin di e buki. Zakarias su pronostikashonnan ta asina kla i presiso, komo sifuera e tabata skirbi di eventonan históriko na lugá di eventonan ku no a sosodé ainda.

Zakarias a pone hopi énfasis riba Jerusalèm. E suidat ta mensioná 42 biaha den e buki. El a profetisá durante tempu ku Jerusalèm ainda tabata un stat di ruínanan. Ma el a mostra ku Dios ta yalurs pa ku e stat i tin kontrol soberano riba e destino di Jerusalèm. E lo kastigá su enemigunan pa loke nan a hasi n’è, i un dia lo restorá e siudat ku gloria i pas. Dios a skohe Jerusalèm den Su gracia (1:17; 2:12; 3:2). Un dia E mes lo biba den e stat (8:3,8).

Ta importante pa kòrda ku profesia ta inkluí dos aspekto. Hopi hende no sa ku mayoria mensahe profétiko ta simpelmente proklamashonnan. Nan ta kòrda e di dos aspekto so di profesia, es ta pronostikashon. Buki di Zakarias ta kontené tur dos aspekto.

1. Zakarias su proklamashonnan (predikashi)

Zakarias a avisá e hudiunan pa bolbe na Dios di *kurason*. Revivamentu tabata loke Dios ta deseá. Zakarias a realisá ku una bes nan kurason ta bon pa ku Dios, e ora ei di mes pueblo di Dios lo *pone man na obra* i sigui ku konstrukshon di tèmpel.

2. Zakarias su prognostikashonnan

Tin tantu pronostikashon den e buki ku tin ora Zakarias ta yama “e buki di Revelashon di Tèstament Bieu”. Di bèrdat, Zakarias su profesianan ta kòrda nos di e bukinan di Revelashon i Daniel. I méskos ku e bukinan ei, hopi di Zakarias su profesianan ta sumamente difísil pa komprendé.

B. PROFESIANAN DI E MESIAS DEN E BUKI

Zakarias a pronostiká Israel su futuro, kulminando ku su gloria ora Mesias bin! E tin mas profesia mesiániko ku tur otro profeta menor. Niun otro profeta tin tantu profesia tokante Kristo den tan poko espasio. *Meta di su profesianan tabata pa lamta deseo di hudiu pa nan Rei bin!*

Ripará Zakarias su siñansa tan kla tokante e Mesias. El a profetisá di e 1) Mesias-Rei komo Dios Su Sirbidó [3:8], un Sirbidó ku ta sufri [kapítulo 9]; 2) Kristo komo e Rama [3:8]; 3) Mesias lo kita inikidat [kapítulo 3]; 4) Kristo lo uni e puestonan di saserdote i rei den Su mes persona [kapítulo 6]; 5) e bon Wardadó [9:16; 11:11], e Wardadó gòlpiá [13:7], e Wardadó rechasá pa Israel [kapítulo 11], i morto di e Wardadó [kapítulonon 12-13]; 6) Kristo drentando Jerusalèm riba yu di buriku [9:9]; 7) traishon di e Mesias pa trinta pida di plata [11:12-13]; 8) Esun ku man i pia trasasá [12:10]; 9) Kristo heridá den kas di Su amigunan [13:6]; 10) kombertimentu di Israel [kapítulo 13]; 11) regreso di Kristo na Seru di Oleifi [14:3-8]; 12) destukshon di enemigunan di Israel, salbashon di Jerusalèm i e reino di mil aña di Mesias riba henter mundu for di Sion [kapítulo 14].

Ta bon pa kòrda ku e profetanan di Tèstamènt Bieu *no* a mira e dos binida distinto di Kristo. Nan no tabata sa ku tin un lapso di tempu meimei di su dos binida. Tin ora por haña profesianan di e Mesias Su promé binida (nasiendo na Bètlehèm) huntu ku un pronostikashon di Su di dos binida (ora E lo bin ku splendor pa reina riba henter mundu). Nos por komprendé esaki ora nos ta kòrda ku mirando dos seru djaleu, bo ta mira solamente dos tòp. Bo no por mira e vaye meimei. Di igual manera, e profetanan di Tèstamènt Bieu no por a mira ku tin un espasio grandi di tempu meimei di e dos binidanan di e Mesias. Zakarias tabatin e mèsun perspektiva.

C. SITANAN DI E BUKI

E outornan di Tèstamènt Nobo a sita Zakarias diferente biaha muchu mas ku algun otro profeta. Motibu pa esaki ta pasobra tin tantu profesia ku ta mustra dirèkt den direkshon di Hesu-Kristo. Nota tantu e sitanan dirèkt komo esnan indirèkt.

SITANAN DIRÈKT	
PROFESIA	KUPLIMENTU
Rei umilde riba buriku - 9:9-18	Mt 21:4-5; Jn 12:14-16
Rechasá i traishona pa 30 pida di plata – 11:12-13	Mt 26:15; 27:9-10
E lo wòrdu kòrtá/hinka - 12:10	Mt 24:30; Jn 19:37
Wardador heridá – 13:7-9	Mt 26:31,56; Mk 14:27

INDIKASHONNAN INDIRÈKT	
PROFESIA	KUPLIMENTU
Sirbidó – 3:8	Mk 10:45
Rama – 3:8; 6:12	Lk 1:78
E piedra – 3:9; 10:4	Rom 9:31-33
Rei-Saserdote – 6:13	Heb 6:20 - 7:1
Aliansa di sanger pa restorashon di Su pueblo – 9:11	Mk 14:24
Mesias lo reina ku pas i hustisia na Jerusalèm – 9:9-10; 14:9	Rev 11:5; 19:6
Su di dos binida i koronashon - 14:1-5	Mt 25:31; Jn 10:16; Ech 1:11; 1 Tes 3:13; Rev 11:15; 21:27
Òrdu nobo riba mundu – 14:6-19	Rev 21:25; 22:1,5

Literatura Konsultá

- Archer, Gleason L. Jr., *A Survey of the Old Testament Introduction* (Chicago: Moody Press, 1985), p. 431-438.
- Baxter, J. Sidlow, *Explore the Book* (Grand Rapids: Zondervan Publishing House, 1960), vol. 4, p. 235-256.
- Benware, Paul N., *Survey of the Old Testament* (Chicago; Moody Press, 1988), p. 231-233.
- Douglas, Alban, *Old Testament Survey* anotashon di lèsnan na Prairie Bible Institute (Three Hills, 1983), p. 116.
- Demaray, Donald E., *A Layman's Guide to Our Bible* (Los Angeles: Cowman Publishing Company, 1964), p. 119-120.
- Freemen, Hobart E., *An Introduction to the Old Testament Prophets* (Chicago: Moody Press, 1972), p. 333-346.
- Hill, Andrew E. & Walton, John H., *A Survey of the Old Testament* (Grand Rapids: Zondervan Publishing House, 1991), p. 416-424.
- Jensen, Irving L., *Jensen's Survey of the Old Testament* (Chicago: Moody Bible Institute, 1978), p. 462-467.
- McGee, J. Vernon, *Thru the Bible* notes, p. 311-312.
- Mears, Henrietta C., *What the Bible is All About* (Minneapolis: World Wide Publications, 1966), p. 328-332.
- Miller, Adam W., *Brief Introduction to the Old Testament* (Anderson, Indiana, Warner Press, 1964), p. 162-164, 209-211.
- Wiersbe, Warren W., *Expository Outlines on the Old Testament*, (Convington, Kentucky: Calvary Baptist Church, March 1973).
- Wood, Leon J., *The Prophets of Israel* (Grand Rapids: Baker Book House, 1979), p. 369-373.